



Lise e comence a tornâ fûr, denant de barache des pomis di zucar e ue passe.

E poie lis mans suntun zei di ananas candît, taiât a rudielis. E plee la schene, e sgrasaie, lis streçis scjassadis de trimarole.

Lussie, in bande di jê, ancjemò cuntune sgraçade di sbrume di zucar sot il nâs, no rive adore nancje a spostâsi. L'amie si volte viers di jê: un bugnon bocon tant che un miluç i ven sù pal cuel, planc. Pene sot il barbuç, la piel no ten bot e si spache, butant fûr une porcarie gropolose e blanchice, lustre di spudacj. I voi de frute, scocolâts, al somee che a vedin voie di saltâ fûr de muse. L'impast al sbrisse su la piel: une sorte di madracat, ruspi di robe mastiade, si strissine lontan de cjar.

*Armide e misure la farine, misturade a polvarine d'arint, la disfe in aghe e lagrimis. E à gratât parfin lis ongulis, che e messede insiemit dal ros dal ûf.*

*Par sgrifignâ, e pense, al bastarà un piçut.*

Sandrine si scrofe jù denant di un marcjadant di massarie.

Lu steve cjalant, tant che al jere daûr a taiâ une latine cuntun curtissat, e un agagn i à sdrumât il stomi.

Pôc dopo, il grum si slontane, lassant une sie di mierde.

*Il zucâr al è fundamentâl, i àn dite.*

*Par meti adun il so, i coventin mês: al à cristai come furmiis slusintis, al nas di jerbis che aromai no si cjatin cuasi plui.*

*Il dolç al tache, e pense, al da indaûr il frut ae panze*

Gabriel 'nd à mangjade mieze: bocon masse lizêrs par roseâ i budiei.

Luca invezit 'nd à mangjadis dôs e il slambri inte panze al è larc tant che une man.

Desenis di fritulis, mastiadis o cuasi digjeridis, a sdrumin i stomis e vuastin la piel.

A van dutis intune sole direzion, uciei viers la lôr Vierte.

*Armide, di daûr la so barache di fritulis, e zonte il lat al impast e e proferis lis peraulis sintudis intal sium.*

*Lagrimons di contentece a sgrin une muse strassomeade de matetât.*

*No 'nd à mai podûts vê, ma cumò, e spero, i fruts vignaran ducj li di jê.*

**Conte dal Ostîr - Raffaele Serafini**

**Si pues lei ancje *par talian, inglês e spagnûl***

Par condividi:

Facebook

WhatsApp

Telegram

Print

Email